

УЛС ХООРОНД БАЙНГЫН АЧАА ТЭЭВРИЙН “С” ТӨРЛИЙН ЗОРЧИХ ЗӨВШӨӨРЛИЙН БИЧИГ ОЛГОХ ЖУРАМ

Нэг. Нийтлэг үндэслэл

1.1. Олон улсын автотээврийн харилцааны тухай Монгол Улсын Засгийн газар, БНХАУ-ын Засгийн газар хоорондын хэлэлцээрийг хэрэгжүүлэх тухай Протоколд заасан улс хоорондын байнгын ачаа тээвэрлэлт гүйцэтгэх “С” төрлийн зорчих зөвшөөрлийн бичиг /цаашид “зөвшөөрлийн бичиг” гэх/ олгох үйл ажиллагааг энэ журмаар зохицуулна.

1.2. Энэхүү журмын зорилт нь зөвшөөрлийн бичиг олгох үйл ажиллагааг ил тод болгож, олон улсын тээвэрлэлт гүйцэтгэхэд тавигдах стандартын шаардлагыг хангуулах, тээвэрлэлтийн үйл ажиллагаанд оролцогч талуудын хүлээх хариуцлагыг дээшлүүлэхэд оршино.

1.3. Улс хоорондын байнгын ачаа тээвэрлэлтийн үйл ажиллагаанд оролцогч, зөвшөөрлийн бичиг олгох, ашиглах, хяналт тавих үүрэгтэй эрх бүхий албан тушаалтан, хуулийн этгээд болон хууль тогтоомжид заасан бусад байгууллага энэ журмыг мөрдөнө.

1.4. Энэ журам нь уул уурхайн бүтээгдэхүүнээс бусад импортын бараа бүтээгдэхүүний тээвэрлэлт гүйцэтгэх автомашинд зөвшөөрлийн бичиг олгох үйл ажиллагаанд хамаарахгүй.

Хоёр. Зөвшөөрлийн бичиг олгох үйл ажиллагаа

2.1. Уул уурхайн бүтээгдэхүүний тээвэрлэлт гүйцэтгэх тээвэрлэгч нарт зөвшөөрлийн бичиг олгох үйл ажиллагааг олон улсын гэрээ, хэлэлцээр болон үндэсний хууль тогтоомжид нийцүүлэн зохион байгуулна.

2.2. Зөвшөөрлийн бичиг олгохдоо аливаа этгээдэд давуу байдал олгохгүй байж, ашиг сонирхлын зөрчил гаргахгүйгээр ил тод, нээлттэй байдлаар зохион байгуулж, зөвшөөрлийн бичгийн олголтын талаарх мэдээллийг олон нийтэд нээлттэйгээр хүргэж ажиллана.

2.3. Зөвшөөрлийн бичгийг олборлолтын үйл ажиллагаа эрхлэгч этгээдтэй байгуулсан тээвэрлэлтийн гэрээг үндэслэн тээврийн нэгдсэн системд бүртгэлтэй улс хоорондын ачаа тээвэрлэлт гүйцэтгэхэд тавигдах холбогдох хууль тогтоомж, стандартын шаардлагыг хангасан аж ахуйн нэгжийн тээврийн хэрэгсэлд олгоно.

2.4. Уурхайгаас төмөр замаар тээвэрлэгдэж буй уул уурхайн бүтээгдэхүүнийг улсын хил дамнуулан тээвэрлэх тээвэрлэгчид олгох зөвшөөрлийн бичгийг тухайн төмөр зам эзэмшигчтэй байгуулсан тээвэрлэлтийн гэрээг үндэслэн олгох, эсхүл зөвшөөрлийн бичгийг төмөр зам эзэмшигчид шилжүүлж болно.

2.5. Зөвшөөрлийн бичиг олгохдоо дараах зүйлийг харгалзан үзнэ. Үүнд:

2.5.1. Тээврийн үйл ажиллагаанаас олсон орлогыг үнэн зөв мэдүүлж, улсын төсөвт төлөх ёстой татвар, хураамжийг төлж барагдуулсан байдал;

2.5.2. Жолооч, ажилчдын ажиллах орчин нөхцөлийг сайжруулж, Хөдөлмөрийн аюулгүй байдал, эрүүл ахуйн тухай хууль болон Хөдөлмөрийн хуульд заасан үүргээ хэрэгжүүлэх чиглэлээр авч хэрэгжүүлсэн арга хэмжээ;

2.5.3. Ачаа тээвэрлэлт гүйцэтгэх тээврийн хэрэгсэл болон жолоочийн хариуцлагын даатгалд хамруулсан байдал;

2.5.4. Үйлдвэрчний эвлэлийн гурван талт хэлэлцээрт заасан ажил олгогчийн зүгээс авч хэрэгжүүлэх ёстой арга хэмжээний хэрэгжилтийн байдал;

2.5.5. Жолоочийн цалинтай уялдуулан нийгмийн даатгал төлсөн байдал;

Гурав. Оролцогч байгууллагуудын эрх, үүрэг

3.1. “Автотээврийн үндэсний төв” ТӨҮГ /цаашид “Үйлдвэрийн газар” гэх/ нь дараах эрх, үүргийг хэрэгжүүлнэ. Үүнд:

3.1.1. Уул уурхайн бүтээгдэхүүний тээвэрлэлтэд оролцох аж ахуйн нэгж, тээврийн хэрэгсэл, жолоочийн нэгдсэн мэдээллийн санг хөтлөх, уг сангийн аюулгүй байдал, хөгжүүлэлтийг хариуцах;

3.1.2. Ачаа тээвэрлэлтэд ажиллах тээврийн хэрэгслийн техникийн байдлыг шалгах, 6 сар тутам бүртгэлтэй тээврийн хэрэгслийн үзлэг тооллогыг зохион байгуулж, мэдээллийн сан дахь бүртгэлийг тогтмол шинэчлэх;

3.1.3. Экспортын ачаа урсгалын хэмжээ, хилийн боомтын нэвтрүүлэх хүчин чадалтай уялдуулан тээврийн хэрэгслийн бүртгэлийг зохион байгуулах, тухайн жилд ашиглах зөвшөөрлийн бичгийг хилийн боомтуудаар хуваарилах;

3.1.4. Тээвэрлэгч аж ахуйн нэгж, тээврийн хэрэгслийг мэдээллийн нэгдсэн санд бүртгэхдээ тээвэрлэлт хийх хилийн боомт, аж ахуйн нэгжийн тохирох ангилал, хөрөнгө оруулалтын хэлбэр тус бүрээр ангилан бүртгэх;

3.1.5. Зөвшөөрлийн бичиг эзэмшигч тээвэрлэгч аж ахуйн нэгжтэй хариуцлагын гэрээ байгуулж, гэрээний хэрэгжилтэд хяналт тавих, дүгнэх;

3.1.6. Зөвшөөрлийн бичгийн олголтын талаарх мэдээ, тайланг олон нийтэд ил тод мэдээлэх;

3.1.7. Зөвшөөрлийн бичиг олгох үйл ажиллагаа, улс хоорондын ачаа тээврийн зохицуулалт, зохион байгуулалттай холбоотой асуудлаар холбогдох байгууллагуудад санал хүргүүлэх;

3.2. Олборлолтын үйл ажиллагаа эрхлэгч аж ахуйн нэгж, байгууллага нь дараах эрх, үүргийг хэрэгжүүлнэ. Үүнд:

3.2.1. Тээвэрлэгч аж ахуйн нэгжтэй тээвэрлэлтийн гэрээ байгуулахдаа хил нэвтрэх тээвэрлэлт хийх автомашины тоог Үйлдвэрийн газраас хуваарилсан зөвшөөрлийн бичгийн тооноос хэтрүүлэхгүй байх;

3.2.2. Экспортын төлөвлөгөө, тээвэрлэх ачааны хэмжээний талаарх мэдээллийг үйлдвэрийн газарт хүргүүлж, тээврийн хэрэгслийн тоог зөв зохистой хэмжээнд байлгах чиглэлээр үйлдвэрийн газартай хамтран ажиллах.

3.3. Тээвэрлэгч аж ахуйн нэгж, байгууллага дараах эрх үүргийг хэрэгжүүлнэ. Үүнд:

3.3.1. Өөрийн компанийн тээврийн хэрэгслийн техникийн байдлыг хангах, шаардлага хангахгүй, эсхүл өөр аж ахуйн нэгжид шилжүүлсэн тээврийн хэрэгслийн мэдээллийг үйлдвэрийн газарт хүргүүлж, бүртгэлээс хасуулах;

3.3.2. Жолоочтой байгуулсан хөдөлмөрийн гэрээгээр хүлээсэн цалин хөлсийг олгох, хуульд заасны дагуу жолооч нарын эрүүл мэнд, нийгмийн даатгалыг авч буй цалинтай уялдуулан төлөх, жил бүр эрүүл мэндийн үзлэг шинжилгээнд хамруулах;

3.3.3. Тусгай зориулалтын авто замаар хүнд даацын тээвэрлэлт гүйцэтгэх жолооч нарыг эрүүл мэнд, амь насны даатгалд хамруулах;

3.3.4. Гүйцэтгэсэн тээвэрлэлтийн талаарх мэдээллийг тогтоосон хугацаанд Үйлдвэрийн газарт хүргүүлэх.

Дөрөв. Бусад зүйл

4.1. Дараах тохиолдолд тээвэрлэгчид зөвшөөрлийн бичиг олгохгүй. Үүнд:

4.1.1. Зөвшөөрлийн бичгийг гуравдагч этгээдэд болон өөрийн компанид бүртгэлтэй жолоочид дамлан худалдах зөрчил гаргасан аж ахуйн нэгжид олгосон зөвшөөрлийн бичгүүдийг хүчингүй болгож, нэг жилийн хугацаанд зөвшөөрлийн бичиг дахин олгохгүй;

4.1.2. Энэ журмын 4.1.1-д заасан зөрчлийг 2 буюу түүнээс дээш удаа гаргасан тээвэрлэгчид дахин зөвшөөрлийн бичиг олгохгүй;

4.1.3. Тээвэрлэлтийн гэрээ байгуулахдаа хуурамч бичиг баримт бүрдүүлсэн нь тогтоогдсон тохиолдолд зөвшөөрлийн бичгийг хүчингүй болгож, дахин олгохгүй.

4.2. Олон улсын гэрээ, хэлэлцээрийн дагуу зөвшөөрлийн бичгийг гуравдагч этгээдэд шилжүүлэхийг хориглох бөгөөд зөвшөөрлийн бичиг олгогдсон тээврийн хэрэгслийг өөр этгээдэд худалдан борлуулах тохиолдолд тухай тээврийн хэрэгсэлд олгосон зөвшөөрлийн бичиг хүчингүй болно.

4.3. Хил гаалиар хориотой бараа бүтээгдэхүүн тээвэрлэсэн, тээвэрлэхийг оролдсон, удаа дараа замын хөдөлгөөний аюулгүй байдлын эсрэг гэмт хэрэг үйлдсэн, жолоодох эрхийн оноо дуусан жолоочийн жагсаалтыг үүсгэж, улс хоорондын тээвэрлэлтэд оролцуулахгүй байж болно.